

# LIS PREDICJIS DAL MUINI

di pre Josef Marchet - Udin, 1965

## Preambul

Al è dibant lâ a cirî Gargagnà su lis mapis dal Friûl: no si cjatilu nancje in chês plui minudis e precisis che a doprin i militârs, indulà che a son segnadis fin lis farcadicis. Gargagnà nol è une "entitât gjeografiche"; al è dut il Friûl cjalât de bande dal ledrôs, di chê bande dulà che une tele e mostre ducj i siei grops, dutis lis zontis, lis mandis, i difiets, in sumis dute la veretât.

O sin usâts a une forme di retoriche a bon presit, che e puarte adalt tant il nestri paîs, che il nestri popul, parsore di ducj chei altris vicins e lontans. Chest al è il dret; ma e vûl metude in cont ancje chê altre muse, bisugne vê la fuarce di cjalâ dut cence parevoi e di pesâ dut cence baronade. Intun cuadri lis robis claris a parin plui lusorosis se a son dongje lis ombris e lis maglis, e se a no son ombris ni maglis, si po sta sigûrs che e je dute une bausie, e no ven nancje voie di cjalâlu.

Cheste veretât e je la urdidure di chest libri; la trame invezit e je une fente, une bausie: e salacor i covente une peraule di spiegazion. Secont cheste fente, Gargagnà di `Sore e je une vile dal Friûl di mieç: une frazion, nus àn insegnât a dî i talians, cun siet-votcent animis; e in union cun Gargagnà di `Sot, cun Lupignan e cualchi altri cjasâl plui minût, a formin il Comun di Scufons. A Gargagnà di `Sot e je la comune e la plêf e un pôc di moviment comerciâl che al da a cheste vile un fregul di ande citadine. A Gargagnà di `Sore nol è nuie: al è un borgat di staipis e di landris; di murats cence stabilidure, di tamars plens dome di catans e scovacis, di int grobiane plene di presunzion e di pretesis. Da pît la vile e je la uniche abitazion civîl dal paîs: la ostarie di Florean Baduscli, un forest che al sa fa i siei interès cence trops scrupui; insom, a un tîr di sclope des cjasis, e je la gleseute di San Pieri, une costruzion dal Cinccent cuntune cjampanute sul colm de façade e un quartiut devant de puarte, su la strade. Za timp in cheste glesie al jere un vicjari curât, che al dipendeva dal plevan de vile di `Sot; ma cumò nol è nissun, par vie che la int di Gargagnà di `Sore e sta miôr cence che i predis a vegnin a meti il nâs intai lôr afârs e a impaçâsi des lôr cragnis. Cussì il paîs al è cence cure di animis di nissune sorte: il plevan al mande cualchi predi a dî messe a San Pieri la domenie e cualchi rare volte in disdivore (par solit al rive sù sflanchinant e tirant la asime, pre Scjefin, un capelan vieli e clopadiç, che indi à une gnoche a fâ chel quart di ore di rive). La glesie e je piçule, che un cuarante di lôr a stentin a stâ dentri: al ven a messe un tropot di feminis, cualchi fantaçute, un scjap di fruts e vot o dîs oms.

La vilie des fiestis, sore sere, il muini de glesie al ten sù il rosari, e une dozene di personis, fra grancj e piçui, a vegnin a preâ. Il muini di Gargagnà al è Vigji Scuete: un muini monumentâl, grant e grues, sclet di lenghe e simpri sigûr di se. Nassût in chel altri secul, al è stât dibot trente agns pal mont, prin su lis fornâs di modon e po a fâ il manauâl e il muradôr. Cui carantans cjavâts e metûts vie al è rivât adore di cjoli un pâr di cjamputs e une barache che al à sdrumade par fâ sù une sô cjasute. Passade la prime vuere nol è plui lât in niò: al à vivût cun chel tocut di braide e fasint dalminis par dut il paîs. Tal prin no i mancjavin aventôrs e al lavorà fuart; ma dopo chê altre vuere a son lâts simpri al mancul, e cumò a son restâts dome sîs o siet viei che, vie pal Unvier, a puartin inmò chei imprescj.

Vigji al fâs il muini sore nuie; ma cun chê scuse al si sint la prime autoritât dal paîs. La sere prin des fiestis al va jù dal plevan a cjavâ i ordins pal indoman e il plevan i comande di publicâ in glesie l'orari de messe e des funzions e cualchi altri avîs. E di chê bande lui si profite par tirâle in lunc, strucjant fûr dut ce che i bol tal stomi: lis sôs impinions, i siei comentis, lis sôs critichis, lis sôs sentenziis sul cont des personis e dai fats di Gargagnà di 'Sore. Cussì e ven fûr ogni volte une "predicje dal muini" curte, sclete, cuinçade cun sâl e pevar e asêt. Parcè che al va dit che Vigji Scuete nol à parevoi ni smuars in bocje: nol à rivuart par nissun, ni zovins ni viei, ni puars ni siôrs, ni ignorants ni studiâts, nancje pai predis... Co no i pâr juste une robe cualunche, al sune pal timp cence nissune remission. Vigji Scuete al è un bon cristian di fede ferme e sclete, cence complicazions e cence buerisinis politichis; e i siei judizis a son in fin dai conts, judizis che al podarès dîju il plevan; e je la maniere di presentâju, lis peraulis, il lengaç che al taie, che al sponç e cualchi volte al è tant ordenari, che il plevan nol podarès fâsi sintî a doprâlu.

Cussì mo cualchidun al à vût il pinsîr di rincurâ e di meti insiemit almancul un braç di dutis chestis predicjis, che a son stadis publicadis ancje in cualchi sfuei, come testimoniance di vite furlane intun moment speciâl de nestre storie - i prins agns dopo la vuere - e come esempi di lenghe furlane inmò nete cence messedancis e cence contaminazions. Par chest troi al è rivât chest librut.